


特別  
18  
3414  
7










門 18  
號 3414  
卷 7

御訂全金詩增補中州集卷十九

金元好問原本

王內翰若虛 三十八首 補二首

若虛字從之棗城人承安二年經義進士  
少日師其舅周德卿及劉正甫得其論議  
為多博學強記誦古詩至萬餘首他文稱





是善持論李屏山杯酒閒談辯鋒起時人  
莫能抗從之能以三數語窒之使噤不得  
語其爲名流所推服類此釋褐鄜州錄事  
歷門山令入翰林自應奉轉直學士居冷  
局十五年崔立之變羣小獻諂爲立起功  
德碑以都堂命召從之從之外若遜辭而  
實欲以死守之時議稱焉北渡後居鄉里  
癸卯三月東游與劉文季輩登泰山憩於

黃峴峯之萃美亭談笑而化時年七十從  
之天資樂易負海內重名而不立厓岸雖  
小書生登其門亦折行輩交之滑稽多智  
而以雅重自持謀事詳審出人意料人謂  
從之於中外繁劇無不堪任直以投閒置  
散故百不一試耳自從之沒經學史學文  
章人物公論遂絕不知承平百年之後當  
復有斯人否也子恕字寬夫



全金詩卷十九  
二  
**補**歸潛志與定元光閒余在南京從趙閒  
閒李屏山王從之雷希顏諸公游多論爲  
文作詩趙於詩最細貴含蓄工夫於文頗  
粗止論氣象大槩李於文甚細說關鍵賓  
主抑揚於詩頗粗止論詞氣才巧故余於  
趙則取其作詩法於李則取其爲文法若  
王則貴議論文字有體致不喜出奇下字  
止欲如家人語言尤以時辭爲戒與李屏

山之純學大不同嘗曰之純雖才高好作  
險句怪語無意味亦不喜司馬遷史記云  
失支墮節多韓退之原道如此好文字未  
云人其人火其書太下字柳子厚肥皮厚  
肉柔筋脆骨之類此何等語千古以來惟  
推東坡爲第一又多發古名篇中疵病淵  
明歸去來辭前想像後直述不相侔伯倫  
酒德頌有大人先生是寓言後聞吾風聲



吾當作其韓退之盤谷序前云友人後云  
昌黎韓愈似不相識永叔蘇子美墓誌多  
爲人所傳旣用爭字當曰人爭傳之不然  
曰爲人所傳不須爭字子瞻超然臺記物  
有以蔽之矣作字好此類甚多不可勝紀  
雷則論文尚簡古全法退之詩亦喜韓兼  
好黃魯直新巧每作詩文好與朋友相商  
訂有不安相告立改之此亦人所難也

**補**歸潛志正大中王翰林從之在史院領  
史事雷翰林希顏爲應奉編脩官同脩宣  
宗實錄二公文體不同多紛爭蓋王平日  
好平淡紀實雷尚奇峭造語也王則云實  
錄止文其當時事貴不失真若自作史則  
又異也雷則云作文字無句法委靡不振  
不足觀故雷所作王多改竄雷大憤不平  
語人曰請將吾二人所作令天下文士定



其是非王亦不屑王嘗曰希顏作文好用  
惡硬字何以爲奇雷亦曰從之持論甚高  
文章亦難止以經義科舉法繩之也

**補**金史崔立之變羣小附和請爲立建功  
德碑翟奕以尚書省命詔王若虛爲文時  
奕輩恃勢作威人或少忤則讒構立見屠  
滅若虛自分必死私謂左右司員外郎元  
好問曰今召我作碑不從則死作之則名

節埽地不若死之爲愈雖然吾姑以理論  
之乃謂奕輩曰丞相功德碑當言何事奕  
輩怒曰丞相以京城降活生靈百萬非功  
德乎曰學士代王言功德碑謂之代王言  
可乎且丞相旣以城降則朝官皆出其門  
自古豈有門下人爲主帥誦功德而可信  
乎後世哉奕輩不能奪乃召太學生劉祁  
麻革輩赴省使好問張信之喻以立碑事



金詩卷十九  
五  
日衆議屬二君且已白鄭王矣二君其無  
讓祁等固辭而別數日促迫不已祁卽爲  
草定副好問好問意未愜乃自爲之旣成  
以示若虛乃共刪定數字然止直叙其事  
而已後兵入城不果立也若虛有慵夫集  
淳南遺老集若干卷

攄憤

非存驕吝心非微正直譽浩然方寸閒自有太高

處平生少諧合舉足逢怨怒禮義初不愆謗訕亦  
奚顧孔子自知明桓魋非所懼孟軻本不逢豈爲  
臧氏沮天命有窮達人情私好惡以此常泰然不  
作身外慮

贈王士衡

王生非狂者乃以善哭稱每至欲悲時不閒醉與  
醒音詞初惻愴涕泗隨縱橫問之無所言坐客笑  
且驚王生不暇卹若出諸其誠墜陀與生友此意



猶未明絲染動墨悲麟亡傷孔情韓哀峻嶺陟阮  
感窮途行涕流賈太傅音抗唐衢生古來哭者多  
其哭非無名生其偶然歟何苦摧形神如其果有  
爲爲爾同發聲

貧士歎

甌無塵瓶無粟北風蕭蕭吹破屋入門四顧何淒  
涼稚子低眉老妻哭世無魯子敬郭元振之真丈  
夫故應餓死填坑谷蒼天生我亦何意蓋世虛名

食不足爭如只使冗且愚大腹便便飽梁肉

感秋

西風撼庭柯疎葉鳴策策天地一蕭條羈懷亦岑  
寂青春恍如昨轉盼年半百自從長大來轉覺日  
月迫功名非所慕老大不足恤怛然感時心自亦  
不能釋清晨理短髮已見數莖白刀鐻雖可施殆  
似兒子劇此身委蛻耳毀棄無足惜況於毛髮閒  
而乃強脩飾青青如陸展星星行復出畢竟白滿



頭復將何所摘

生日自祝

空囊無一錢羸軀兼百疾況味何蕭條生意渾欲  
失清晨聞喧呼親舊作生日我初未免俗隨分畧  
脩飾舉觴聊自祝醉語盡情實神仙恐無從富貴  
安可必修短卒同歸何足喜與戚一祈羸康強二  
願早閒適衣食無大望但願了晨夕萬事不我撻  
一心常自得優游終吾身志願從此畢

失子

妍妍掌中兒捨我一何遽其來誰使之而復奄然  
去平生三舉子隨滅如朝露顧我能無悲其如有  
天數自從學道來衆苦頗易度有後固所期誠無  
亦何懼人生得清安政以累輕故婚娶眼前勞託  
遺身後慮百年曾幾何爲此雛稚悞顧語長號妻  
此理亦應諭

憶之純三首



幼歲求真契中年得偉人傾懷當一面投分許終  
身燈火談玄夜鶯花逐勝春何時重一笑胸次欲  
生塵

面目三年隔音書萬里遙宦途俱蹭蹬日事各蕭  
條志大謀常拙身孤道易消本無當世用隱處會  
相招

雋氣輕天下高情到古人銜杯曼卿放下筆老坡  
神時論誰優劣人材自屈伸窮愁須理遣不必淚

沾巾

復寄二首

志大言高與世違拂衣真作竹林歸黃塵道口風  
波惡未必先生自處非

自笑趨塵亦強顏食謀未免敢言閒紫芝果可充  
饑腹從子玉屏巖石間

病中二首

學道今何得謀生久不成藍衫幾棄物絳帳亦虛



名事拙應天意交疎卽世情煩憂時自解感觸又  
還生

鬱鬱窮愁意營營久病身詩情渾欲減藥物但相  
親未得驅窮鬼終須問大鈞三時勞慰撫甚愧故  
人真

感懷

枉却全家仰此身書生那是治生人百憂耿耿填  
胸臆強作歡顏慰老親

自笑

酒得數杯還已足詩過兩韻不能神何須豪逸攀  
時傑我自世間隨分人

別家

到了身安是本圖何須身外覓浮虛誰能置我無  
饑地却把微官乞與渠

慵夫自號

身世飄然一瞬間更將辛苦送朱顏時人莫笑慵



夫拙差比時人得少閒

西城賞蓮呈晦之

晦之自  
號放公

舊賞回頭已隔年高花又見出新妍偶成濁酒狂  
歌會恰及斜風細雨天樂事適來偏有興閒身常  
得分無緣作詩莫怪多誇語差比放公先着鞭

題淵明歸去來圖五首

此下皆中  
年所作

靖節逃途尚爾賒苦將覺悟向人誇此心若識真  
歸處豈必田園始是家

孤雲出岫莫鴻飛去住悠然兩不疑我自欲歸歸  
便了何須更說世相遺

拋却微官百自由應無一事挂心頭銷憂更藉琴  
書力藉問先生有底憂

得時草木竟欣榮頗爲行休惜此生乘化樂天知  
浪語看君於世未忘情

名利醉心濃似酒貪夫袞袞死紅塵折腰不樂翻  
然去此老猶爲千載人



翰長閒閒公命題城南訪道圖戲作二詩且  
爲解之云

得道由來不必勞癡兒舍父謾逋逃閒閒老子還  
多事時向招提打一遭

竹木蕭森蔭綠苔幽襟自愛北軒開主人無說吾  
何問乘興而來興盡迴

答鄭下辨禪師見戲代防禦高侯

酒肆淫房總道場偶然遊戲亦何妨阿師自墮泥

犁趣更笑春風柳絮狂

還家五首

日日他鄉恨不歸歸來老淚更沾衣傷心何啻遼  
東鶴不但人非物亦非

荒陂依約認田園松菊存亡不足論我自無心更  
懷土不妨猶有未招魂

山杏溪桃化棘榛舞臺歌榭墮灰塵春來底事堪  
行處門外流鶯枉喚人



回思夢裏繁華事幸及當年樂此身閒立斜陽看  
兒戲憐渠虛作太平人

艱危嘗盡鬢成絲轉覺謹譁不可期幾度哀歌仰  
天問何如還我未生時

山谷於詩每與東坡相抗門人親黨遂有言  
文首東坡論詩右山谷之語今之學者亦多  
以爲然漫賦四詩爲商畧之云

絕足由來不可追汗流餘子費奔馳誰言直待南

遷後始是江西不幸時

信手拈來世已驚三江袞袞筆頭傾莫將險語誇  
勁敵公自無心與物爭

戲論誰知出至公螭蟬信美恐生風奪胎換骨何  
多樣都在先生一笑中

文章自得方爲貴衣鉢相傳豈是真已覺祖師低  
一著紛紛嗣法更何人

王內翰子端詩近來陡覺無佳思縱有詩成



似樂天其小樂天甚矣漫賦三詩爲白傅解

嘲

功夫費盡謾窮年病入膏肓豈易鐫寄語雪溪王  
處士恐君猶是管窺天

東塗西抹鬪新妍時世梳粧亦可憐人物世衰如  
鼠尾後生未可議前賢

妙理宜人入肺肝麻姑搔背豈勝鞭世閒筆墨成  
何事此老胸中自有天

宮女圍碁圖

盡日羊車不見過春來雨露向誰多爭機決勝元  
無事永日消磨不奈何

緱山廟

緱山突兀上空虛古栢森森幾萬株一自吹笙仙  
去後乘鸞曾返故鄉無

**附**五嶽志王從之隱居泰山趺而化人  
稱其地曰蛻仙巖元人有石刻



**附**遺山集公幼穎若夙昔在文字閒者鎮人以文章德行稱者褚公茂先而後有周先生德卿德卿公舅行自齟齬閒識公爲偉器教督周至盡傳所學及官四方又託之名士劉正甫使卒業焉弱冠擢承安二年經義進士甲科公資稟醇正且有師承之素故於事親待昆弟及與朋友交者無不盡學無不通而不爲章句所困頗譏宋

儒經學以旁牽遠引爲夸而史學以探賾幽隱爲功謂天下自有公是言破卽足何必呶呶如是其論道之行與否戰國諸子之雜說寓言漢儒之繁文末節近世士大夫參之以禪機玄學欲聖賢之實不隱難矣經解不善張九成史例不取宋子京詩不愛黃魯直著論評之凡數百條世以劉子玄史通比之爲人強記默識誦古詩至



萬餘首他文稱是文以歐蘇爲正脉詩學  
白樂天作雖不多而頗能似之秉史筆十  
五年新進入館日有記錄之課書吏以呈  
宰相必問王學士曾點竄否又善持論李  
右司之純以辨博名天下杯酒淋漓談辭  
鋒起公能三數語窒之惟有嘆服而已典  
貢舉二十年門生半天下而不立崖岸雖  
小書生登其門亦殷重之滑稽無窮談笑

尤有味而以雅重自持朋會閒春風和氣  
周浹四座使人愛之而不忘也

**附** 滹南集若虛與彭悅王權周嗣明爲林  
下四友自爲贊并序云東垣彭子升悅王  
士衡權周晦之嗣明皆予心契也晦之於  
予爲親故其相知最早後游京師始識士  
衡於稠人中言論慷慨遂如平生當是時  
泛見子升而未熟也已而復定交於觴次



予年爲長子升次之士衡又次之而晦之  
最少吾四人者臭味相似而意氣相投者  
也故不結而合旣合而歡至於益深而莫  
之間其好惡取舍互有短長而要歸於中  
辯爭議刺閒若不能相容而終於無憾方  
其俱在里中行必借宴必共詩雖不多而  
嘲戲贈答時出數語以相娛酒雖不廣而  
花時月夕一杯一酌亦自不廢也嘗約他

年爲林下之游且各爲別號以自寄焉蓋  
予以慵夫而子升以澹子士衡爲狂生而  
晦之則放翁也曰澹曰慵曰狂曰放世以  
爲怪而自謂其真施於仕途固非所宜而  
在隱居則無害也是故安之而不疑爲是  
約已遂想像而贊之云盤礴兮巖阿容與  
兮煙蘿藉豐草兮偃臥愬長風兮浩歌塵  
海邈其如隔渺高軒兮不我過險而風波



密而網羅突而干戈如四人者何又慵夫  
自號云身世飄然一瞬間更將辛苦送朱  
顏時人莫笑慵夫拙差比時人得少閒

**附**陵川集郝經呈王內翰云霜落雲枯秋  
盡時翰林遺得桂林枝春風久已歸桃李  
劫火從渠照虎貔白髮操戈浮世在赤心  
傾蓋幾人知壺中有酒無天地醉後休歌  
貝錦詩案詩中所云白髮操戈醉歌貝錦

應爲崔立功德碑一事言之也於時從之  
顧惜名節自分一死雖以遜辭理喻而羣  
小輩終不能奪故元裕之表其墓稱其執  
義不爲也然金史謂碑文爲裕之所作而  
從之曾爲之刪定數字於劉京叔則但云  
起草而已則當時事過之後讒人之口不  
但交攻裕之恐尚有援從之以分謗者故  
伯常之詩云爾也



全金詩卷十  
補金王鶚滹南集引予以剽竊之學由白衣入翰林當代鉅公如趙閒閒楊禮部滹南先生皆士林儀表人莫得見之而一旦得侍几視渾源雷希顏良鄉王武叔河中李欽叔亦稱天下之選而十年得與從游故予嘗自謂叨取科第未足爲幸而忝側英游之末茲所以爲幸也歟玉堂東觀側耳高論日夕獲益實多然愛予最深誨予

最切愈久愈親者滹南先生一人而已先生性聰敏蚤歲力學以明經中乙科自應奉文字至爲直學士主文盟幾三十年出入經傳手未嘗釋卷爲文不事雕琢唯求當理尤不喜四六其主持名節區別是非古人不貸也壬寅之春先生歸自范陽道順天爲予作數日留以手書四帙見示曰吾平生頗好議論向所雜著往往爲人竊



去今記憶止此子其爲去取之予再拜謝  
不敏明年春先生亡矣越四年其子恕見  
予於燕京予盡以其書副之又二年藁城  
令董君彥明益以所藏釐爲四十五卷與  
其丞趙君壽卿倡義募工將鏤諸板以壽  
其傳囑爲引予謂先生之學之大本諸天  
理質諸人情不爲孤僻崖異之論如三老  
三省五誅七出之說前賢不敢議而先生

斷之不疑學者當於孔孟而下求之不然  
殆爲不知先生也先生諱若虛慵夫其自  
號云歲屠維作噩閏月初吉日後進東明  
王鶚歛衽書



麻徵君九疇 二十九首

九疇字知幾莫州人三歲識字七歲能草  
 書作大字有及數尺者故所至有神童之  
 目章廟召見問汝入宮殿中亦懼怯否對  
 曰君臣父子也子寧懼父耶上大奇之弱  
 冠任太學有聲場屋閒南渡後讀書北陽  
 山中 其詩云讀書空山裏落月低巖幽山  
 鬼語夜半怪我非巢由又云壯士半  
 凋落鐵花 始以古學自力博通五經於易  
 繡吳鈞



春秋爲尤長少時有惡疾就道士學服氣  
數年疾遂平又從宛丘張子和學醫子和  
以爲能得其不傳之妙大率知幾於學也  
專故所得者深饑寒勞苦人所不能堪者  
處之怡然不以累其業也嘗爲郟城張伯  
玉賦透光鏡欽叔傳之京師趙禮部大加  
賞異貼壁閒坐臥讀之興定末府試經義  
第一詞賦第二省試亦然簾試以脫悞下

第知幾先有才名又連中甲選天下想望  
風采雖牛童馬走亦能道麻九疇姓名正  
大三年右相侯蕭公趙禮部連章薦知幾  
可試館職乃賜<sub>進</sub>亞榜第二甲第一人及  
第授太祝權太常博士應奉翰林文字知  
幾天資野逸高騫自便與人交一語不相  
入則逕去不返顧自度終不能與世合未  
幾謝病去作詩工於賦物如夏英公篆韻



其詩云千狀萬態了不同哭鬼號神自茲  
始簡如庖羲地上畫繁如神農日中市圓  
如有娥乙鳥卵方如姜嫄巨人履傾如怒  
觸不周山遡如逆上蠶叢水積如女媧石  
未鍊碎如昆吾瓦經毀蚩尤旗張尾後曲  
黃帝鼎成足下峙五丈專車斷禹戈九日  
橫天落羿矢流絜不去龍垂髯銜書忽來  
鳳挽背方相四目闕門闕夔牛一脰踣階  
祀貌似心猜未必然  
賴君注釋車南指及手植檜印章等詩

可見也字畫正書八分皆有功詩最其所  
長少時猶失持擇近詩精深峭刻似其爲  
人他文不及也明昌以來以神童稱者五

人太原常添壽四歲作詩云我有一卷經  
不用筆寫成展開無一字晝夜放光明合  
河劉滋文榮六歲有詩云鶯花新物態日  
月老天公劉徵伯祥七歲被旨賦鳳凰來  
儀新恩張漢臣世傑五六歲亦召入賦元  
妃素羅扇畫梅云前村消不得移向月中  
裁其後常隱居不出餘三人者皆無可稱  
道獨知幾能自樹立一日名重天下耆舊



如閒閒公且以徵君目之而不名也壬申  
歲遇亂卒年五十平山常仲明之子德葬  
之小商橋傍近趙莊

**補**歸潛志麻九疇知幾初名文純易州人  
幼穎悟善草書能詩號神童既長入太學  
刻苦自勵為趙閒閒李屏山所知南渡後  
居鄆蔡閒入遂平西山讀書為經義學精  
甚興定末試開封府詞賦乙科經義魁再

試南省復然聲譽大振南都婦人小兒皆  
知名及庭以誤紉士論惜之已而隱居不  
為科舉計正大初門人王說王采苓俱中  
第上以其年幼怪而問之且知知幾為師  
近臣言其有才學平章政事侯公摯翰林  
學士趙公秉文俱薦之特召賜進士第以  
病不拜官告歸病已赴調授太常寺太祝  
俄入翰林後以病去居鄆久之北兵入河



南知幾挈其孥入確山避亂後復出爲兵士所得驅之北邊至廣平病死知幾爲人耿介清苦雖居貧不妄干求卓然以道自守然性隘狹交游少不愜意輒怒去蓋處士之剛者也初因經義學易後喜邵堯夫皇極書因學算數又喜卜筮射覆之術晚更喜醫方與名醫張子和游盡得其學爲文精密巧健詩尤奇峭妙處似唐人嘗作

透光鏡篆韻詩人爭傳寫後以避謗畏時忌持戒不作詩益潛心爲易學與張伯玉宋飛卿雷希顏李欽叔及余先子善先子初攝令鄆城日與唱酬爲友後知幾試開封先子爲御史監試而王翰林從之李翰林之純爲有司因相與讀舉子之文見其有雄麗者相謂曰是必知幾因擢爲魁已而果然士林以得人相賀晚爲趙閒閒所



知有送麻徵君序并詩云

**附**趙秉文答麻知幾書知幾足下相別數月靡日不思山川遼濶致稽裁布人至辱長書累幅意貺勤厚殊慰馳想不審比來舊疾差減否甚懸懸也聞御榜到日足下與李濟之適同榻一升一沉不能不悵然也然此亦何足置懷前者足下與李欽叔各魁省貢羣口磬磬爭爲毀訾及欽叔連

中兩科然後心服如使足下一第後試制策試宏詞當與欽叔並馳爭先未知鹿死誰手豈可成敗論事者哉僕少時應舉被黜戚戚若不復堪處然窮達自有數顯晦自有時以今觀之向之戚戚者何其妄也足下又平生孤苦百狀有求驚得鳩種稷得稗之說天全大賢如足下者必將有用又安知今日之窮天將昌其道非足下之



福耶若得一器淨水照足下宿命還本知見當不出此言也足下生知夙習再來人也三生學道豈不知此大抵一時才人多恃聰明少積前路資糧故佛謂之福慧兩足尊足下無乃近此類尚何怨耶假使吾輩萬一臨死生之際亦當安時處順況未至是耶足下所喜韓子歐子之學固爲純正如退之感二鳥賦上宰相三書亦少年

未知道時語也其後諫佛南遷若與死生利害相忘者然過黃陵廟求哀乞靈恐死瘴霧中亦學聖人而未至者今之士人以緝綴聲律爲學趨時乾沒爲賢能留心韓歐者幾人僕固不當洗垢求瑕若孔子與子貢顏淵問答有不容何病之語第恐孔顏不爾耳也因論聖賢之分

闕

爲忠誠爲謹廉爲放逸爲耿介豈以



窮達而異心哉足下又謂山林有至道芻  
蕘有至人可隱可訪誠哉是言當今之世  
豈必忘言如達磨談道若莊生然後爲得  
也談道吾敬常先生王賢佐談禪吾敬萬  
松秀玉泉政論醫不及儀企賢任子山經  
學與文章不及李之純與足下如足下一  
病自不能療便謂舉世無知醫者可乎足  
下易學自可忘憂遺老至於釋老二家勿

謂秦無人聞頗喜雜學然慎所以習之者  
多難之世益成括之徒當敬而遠之足下  
才高識明過僕數倍固不當爲此喋喋亦  
期有以教我也方屬新秋善加調攝不宣

賦伯玉透光鏡

太陰淪魄元不耀太陽分光成二曜嗚呼怪銅盜  
此幻透影在壁與背肖奩開燿燿光走庭劃如剗  
犀乍脫鞘泓澄秋落百丈潭疑有龍向天門跳秦



娃漢婉化鴛土寵雨恩雲埋鳳詔當年椒塗鑑桃  
李身後泉臺映蓬藿枕簟無情草木香笙歌不暖  
梟狐嘯鬪體一醜不再妍不知持此將安照萬斛  
珠璣委備人喚得偷兒成鬼剽藉問金椎一控時  
何如海上青蠅弔壽如金石佳且好此銘此篆兩  
奇峭今誰子後曩誰先贏得紐樞經蟻竅千古繁  
華一夢醒恍然入手稱神妙丹砂口紫翠羽青萬  
金難買人年少君侯新自洛陽來玉臺人物今温

嶠相看大笑古人癡收鏡入奩還自笑

跋范寬秦川圖

山水人傳范家筆畫史推尊爲第一揭來因看秦  
川圖天下丹青能事畢大山巖巖如國君小山鬱  
鬱如陪臣大石盤盤社與稷小石落落士與民一  
山一形似爭長一石一態如布軍想君胸中有全  
秦見鑿削鑿鑿乃真掌上長安近於日千樹萬樹  
生青春憶昔岐山鳳凰語葱葱柞械霑新雨昆夷



東手密須降不見功勲見歌舞黃金鑄牛西入爨  
五丁雲棧通中國驪山宮闕九天高六處孱王走  
銜璧不信詩書信法家關東半被魚書惑盡卷圖  
籍亦大好五十年兇都一掃章邯董翳舉如毛沐  
猴冠委金陵道北原兵自天而下漢室傾頽如解  
瓦祁山六出縱無功渭水猶堪飲君馬螭蟠老將  
骨未朽草付那能濟陽九技癢投鞭抵歲星歸來  
鹿死何人手神武空矜賀六渾投機常落周人後

竟令馮翊軟沙邊東風一夜吹新柳侵尋阜角相  
料理拋擲龍津浮汴水鷓頭過處已非隋不覺晉  
陽人姓李華清高宴憂宮梧舞馬如何護兩都縱  
得青驪還蜀道肉得沙場白骨無興亡自取不足  
吁可憐神州爲盜區貪徵往古山川事忘却題詩  
賞畫圖

松筮同希顏欽叔裕之賦

犧尊青黃災木命羈絆剪剔傷馬性折松爲筮得



之天此君幸免戕殘橫初象形似有代無不料奇  
功乃差勝人間斤斧不須勞坐中活火鳴笙簫千  
秋蟄骨養霜雪一日奮鬣翻雲濤巖烟擊拂殷雷  
起顛風蹴踏銀山高莫嫌勺水懦無力如捲三江  
都一吸藉汝歲寒姿扶我衰朽質埽除幻夢不到  
眼洗刷埃霾下胸臆捫霞直與羨門期一笑桑田  
海波白

竹瘦冠爲李道人賦

東方有物字豐隆以鳴爲職驅羣聳萬頭濺濺囚  
凍窟欲出不出愁天公迴寒作暖出一噫黑帝不  
敢藏昆蟲所以獨爲六子長揮斥元氣周神功車  
轟鼓震頃萬里六甲雲風隨喚起四陰用事合收  
聲猶奮狂陽鳴不已號令非時遭物玩草木不凋  
花再蕾惱得司秋訴帝闈漏泄機緘法當死天公  
大怪下桎梏推落車中墮巖谷非程非馬亦非人  
化作簷簷一枝竹勁氣剛風難遽銷夜聞風雨猶



全金詩卷十九  
三  
蕭蕭聳身直上三千尺天公又怪干雲霄鬼壓神  
縛不聽出只見白雲鎖三日雲散惟餘青屈盤頤  
隱於臍變仙質道人真是萬物盜斫取爲冠就天  
巧秋霜爭敢上頭顱常與春風同醉倒此冠固奇  
惜未大有冠獨在方之外日月爲藤織四時烟霞  
爲擘綿千載天潢絕漢梁虛碧北斗旋衡簪沆瀣  
不隨脂粉侶後貌不逐風霜陪獬豸一任旋乾復  
轉坤頭上峩峩終古在欲作檀那施此冠不識先

生若爲戴

彈琴懷山中人

門前雪垂垂室中理朱絲手按十三徽心飛天一  
涯故人渺何許萬里驚鴻飛試憑朱絲語一聲聲  
亦悲一彈雪欲落再彈雪正作只在此山中故人  
今憂樂我欲彈文王岐山雲渺茫我欲鼓曾子無  
田可耘耔道遠望不及千山復萬水思君復思君  
正恐鬚髯皤后夔若不來奈此宮商何春風早晚



起百鳥喧庭柯時攜一罇酒爲君奏雲和

夏日

亭柯碧合龍蛇影睡起轆轤鳴曉井一簾曉雨捲  
不晴槐花滿地黃金冷屈指西風又到門相思團  
扇欲生塵何時萬戶垂楊裏高揖金鞭逢故人

牛歎

誰憐宿料一生無身後仍遭金十奴帷蓋却教蒙  
狗馬不知何事負農夫

清明

村村榆火碧烟新拜埽歸來第四辰城裏看家多  
白髮遊春總是少年人

莫春山家二首

山烟向晚白濛濛人過梨花樹底風一犬不鳴村  
徑黑野燈孤起遠林中

語闌壯氣欲消磨奈此青燈永夜何壁上取琴彈  
一曲不知天外落銀河



手植檜印章

梁折山摧入小成日華留得寸暉明不盈一握空  
蟲篆未喪斯文麤姓名草木西周朝有莫圖書東  
觀死猶生二千年後司封紐未信裁時出此情

贈裕之

向來三度見君詩常望西山有所思誰料并州天  
絕處相逢梁苑雪消時賢人樂古聲猶在輦叟文  
高世豈知只恐神蒿不留客秦川如畫渭如絲

秋懷

江山如畫衣冠盡蒲柳無  
情宮殿秋亦用此韻者也

昨夜新涼御褐裘一番節物弄清愁月懸雙杵若  
爲夜人在一隅偏覺秋敗葉只能驚畫扇啼螿終  
不到朱樓還鄉夢斷寒衾曉依舊雲山是蔡州

和伯玉食蒿醬韻

九尺東方生不如一侏儒飲啄各有程厚薄與生  
俱文蒲及屈芟何乃淡以枯正如謝三旌甘心作  
羊屠伊蒿本薪材豈足充庖厨薄雪草堂徑新霜



古城隅河南地差暖冬有不死蕪青來澗邊宮綠  
入几上盃微香能侶菊小苦賢於茶酷烈變醯醢  
薰醲破脂酥書生喜倒說食亦變精麤藉問冰茶  
者何如羔酒乎況爾蓼蓼彼蕭蓬茅固其徒偶然躡  
一等遽欲忘樵夫邇來歲頗饑太半殫在途攘肉  
或至犬首丘不如狐命賤祗求死計窮交議逋尚  
有紈袴兒朝夕食於株寧知埽野稗一飽不易圖  
遂令人輕生不畏鑽與鈇如君有蒿醬猶是千金

軀

復次韻二首

五臟太多可張頤託臞儒自非何曾家安得海陸  
俱莊周幸有粟不至魚肆枯何勞夷門市下車朱  
亥屠春韭與秋菘歲晚不供厨蒿腹不蒿目大方  
果無隅爲醬非負口猶勝范菜蕪豈無青精飯駐  
顏炊一盃豈無菖蒲歎辟邪如神茶又豈無椒花  
除瘟等醑酥蒿於數品中頗同武官麤數品雖異



全金言卷十九  
三  
饌置之醬可乎猶材各有施豈必皆吾徒公綽優  
爲老劣於滕大夫大抵食如士取之非一塗君詩  
誌其味食經有董狐彼哉竈羹指斲棺終莫逋彼  
哉萍虀手竟死珊瑚株寧如醬以蒿不出本草圖  
蓋後人好奇一洗腥砧鉄爲謝饒崇鬼渠今離我  
軀

又  
翌日又爲履道所戲其意似欲窮吾技再和前章書呈伯玉

敵可爲炙啖博哉釋草儒奈何騷人詠不與蘭茝

俱青青發陳芰嫩勝稊生枯面柔似張禹氣冽如  
申屠忽逢易牙口一日登君厨君兄昔在日作事  
太廉隅宦遊三十年不治一室蕪嘗載米之郡政  
如置水盂不義獲八珍棄之猶堇荼相對話終日  
茗椀無鹽酥見客惟恐遲遇飯不擇麤無食但有  
名窮不亦宜乎我本寒素士臥雪袁司徒臭味偶  
相似豈是敦薄夫見君食蒿醬取嘲於仕途和君  
蒿醬詩緼袍隨衣狐詩醬兩情苦此債無由逋蒿



全金言卷十九  
三  
荻無棄材奈此蒼松株何當列鋤甕一依饗禮圖  
唯聞廣廷樂不見轅門鈇此日雖無醬猶堪養羸  
軀

元裕之以山遊見招兼以詩四首爲寄因以  
山中之意仍其韻

石華政可採負我孤舟篷胡爲紅塵裏擾擾槐安  
宮山閒綠蘿月一照千巖空洪崖去不返清游誰  
與同空餘松根泉雜佩流無窮人心墮泥滓不如

與天通舉頭視霄漢浩露洗心胸

日月兩角蝸天地一粒粟老盆可徑醉豈擇瓦與  
玉大笑區中人朱門丐梁肉清曉登少室日夕眺  
王屋紫烟晞吾髮碧霞貯我腹溪中有白雲萬事  
副濯足物物愜幽情不獨蘭與菊

南風入桂樹高葉碧崢嶸舉手戲攀折上與雲烟  
撐黃金閒白玉遍地先晶熒笙簫座閒發鸞鶴空  
中鳴浩歌山谷應起舞衣裳輕一罇石上酒如我



浩氣盈目送飛鴻盡青雲萬里平

國風久已熄如火不再然流爲玉臺詠鉛粉嬌華  
年政須洗妖冶八駿踏芝田青苔明月露碧樹涼  
風天塵土一一盡象緯昭昭懸寂寥抱玉辨爭競  
搖尾憐幸有元公子不爲常語牽

許方邨卽事

聯句  
體

披熱達許方山巔青漫漫野黃麥初割畦綠蔬纒  
灌春籬榮葉深巷樹春花亂烟長見新冶風遠聞

清鍛濯衣女在溪販鐵人棲館牆危壘破石路黑  
沾遺炭山雲頃刻雨沙地須臾曠鐸鳴駕犢畊罩  
密防雞散縲餘殘繭挂釣罷么絲貫沽酒有客賒  
鬻李何人喚朴慘官始威牒煩民更玩歷險小車  
多逢人赭衣半縣遠肉難求山近寇可追何當卜  
隱居尋我杖藜伴

梁山宮圖

梁山宮高高切雲秦家簫鼓空中聞宮殿作雲王



全金詩卷十九  
三  
作龍何人敢謁瀉池君珠圍翠繞窮天下道上行人衣半赭不覺生靈血液枯化爲宮上鴛鴦瓦朝盧生莫侯生師事二人學羨門焉知以政藏其身神仙亦死何曾神空能詐取六孱國不識盧生真間客種成閒隙盧生去尚令道士作鬼語祖龍竟墮此機中以璧見欺猶未悟魚腥引得扛鼎來梁山火滅漢旗開何如後世丹青手一夫不役千樓臺梁山之圖却傳世梁山之宮安在哉

跋伯玉命簡之臨米元章楚山圖

巴東峽壁如駁霞天鑿荆門當虎牙下有奔湍沉碧沙直衝北固如投家雲烟昏曉互明滅朝看沃日莫吞月遠山如指近如拳過客那知空一瞥高人廬此恨來晚不厭孤篷疊往返莫言造物好窮人許大乾坤富君眼以心爲鏡照諸山山如人面紛殊顏扁舟日日青山上青山却在滄波閒人道癡兒固貪取我怪高人亦如許已將胸次衽長江



更把豪端扛巨楚，齎列楓林葉浮舸。巧促魁梧入  
么麼丈尋收拾，無邊春千里遊邀坐。中我自此頭  
吳尾，甌越蠻烟五月髡。人髮江山多處乃爾毒，始  
信中原天下甲。楚山可覽不可上，水氣昏昏且多  
恙。畫山縱不到真山，有楚之峯無楚瘴。靜明居士  
見山饒想在菴中得飽叅，戲呼老李臨君畫已坐  
君貪我更貪。

秋雨小霽湖陽道中

一雨初晴菊瘁花朝來，啼殺報晴鴉。地鄰異域空  
懷古人對殘秋，更憶家十月紅爐是明日。往年新  
火醉流霞，忽忽又上湖陽道。何處還堪駐客槎。

秋望

雲氣東南壯風烟，正北長遠人投屋。小寒草帶城  
荒駟鴨便秋潦，饑牛背夕陽閒情儘堪畫。未要兩  
浪浪。

堂谿城南感寓



斷岸崩崖帶草長茂林高塏晚生涼田頭經水成  
駒臥雲色因風變狗蒼戰地尚餘唐壘柵故城曾  
入楚封疆牛童趨日貪捫蝨那解興亡事可傷  
俳優  
施能賣晉移君貳旃解譏秦救陛郎多少諫臣翻  
獲罪却教若輩管興亡

李道人家山圖

見說高齋任太行溪山襟帶古祠堂圭桐葉落周  
家雨鐵樹根盤晉國霜烽火不堪畊夜月畫圖猶  
可挂殘陽自憐不及汾州鴈春去秋來過石梁

李道人嵩陽歸隱圖

城郭維崇井里維通冠蓋維錯紈綺維叢云誰之  
子招子歸嵩舍我箏筑樂彼潺淙食彼瓦缶遺我  
鼎鐘云誰之子繪子歸嵩離人友鹿避俗朋松石  
嶙我足泉癭我隴吾恐時人笑子歸嵩有山有怪  
有水有龍盜出寇沒嘯兇咻熊吾恐狂人誑子歸



全金詩卷十九  
三  
嵩子謂吾言決意歸嵩歸嵩何如如鴻避弋如鶴  
脫籠與幻俱化與化俱融是以歸嵩南山重重翠  
如植葱北山隆隆紺如堆銅仰嵩俛嵩雨濯雲烘  
嵩之爲我我之爲嵩我聞子言衣如張風心先去  
鳥層雲盪胸靜言思之富爲日蒿貴爲心蓬飾說  
於令詎知任公歸嵩良是生龜脫筒子不歸嵩送  
子歸嵩

陽夏何正卿作疊語四句未成章予復以疊

語寄之凡四變文

緼緼蠢蠢何等民矯矯亢亢內守貞昂昂藏藏獨  
異俗落落莫莫不厭貧歸與歸與且餽口鳳兮鳳  
兮德衰久樂云樂云無絃琴命乎命乎一杯酒匪  
鱸匪鮑故爲藏避言避世必也狂至大至剛秣吾  
馬爰清爰淨脩我牆用之捨之時所係晉如摧如  
寧復計暖然淒然任春秋優哉游哉聊卒歲

紅梅



一種冰魂物已尤朱脣點注更風流歲寒未許東  
風管澹抹濃妝得自由

御訂全金詩增補中州集卷二十

金元好問原本

劉御史從益 三十三首 補二首

從益字雲卿南山翁撫之曾孫大安元年  
進士拜監察御史坐與當路者辨曲直得  
罪去久之起爲葉縣令脩學講義聳善抑



惡有古良吏之風葉劇邑也兵興以來戶  
減三之一田不毛者萬七千畝其歲入七  
萬石故在也雲卿請於大農爲減一萬民  
賴之流亡歸者二千餘家未幾被召百姓  
詣臺乞留不聽入授應奉翰林文字踰月  
以疾卒時年四十四葉人聞之以端午罷  
酒爲位而哭且立石頌德以致哀思之心  
焉雲卿博學強記於經學有所得爲文章

長於詩五言古詩又其所長雷御史說雲  
卿在太學時年甚少嘗有詩云黃金錯落  
雲閒闕紅粉高低柳外牆時輩皆推服之

其卒以詩得名者固已見於此矣

雲卿詩  
如荒烟

斜日村村晚衰柳寒蒲岸岸秋兩鄉留寓  
風薰面千里相望月滿樓子美不妨衣露  
肘長卿猶有賦凌雲春雪云千層寶樓閣  
一片玉山川臨終云壞壁秋燈挑夢破老  
梧寒雨滴愁生此類  
盡多不能悉載也有蓬門先生集行於

世二子祁字京叔郁字文季俱有名於時



補歸潛志金朝兵制最弊每有征伐或邊  
釁動下令僉軍州縣騷動其民家有數丁  
男好身手成時盡揀取無遺號泣怨嗟闔  
家以爲苦驅此輩戰欲其克勝難哉貞祐  
初下令僉軍會一時任子爲監當者以春  
赴吏部調數宰執使盡揀取號監官軍其  
人憤慍叫號交懟於臺省又衝宰相鹵簿  
告丞相僕散七斤大怒趣左右取弓矢射

去已而上知其不可用免之元光未備潼  
關黃河又下令僉軍諸使者歷郡邑自見  
居官者外無文武小大職事官皆揀之至  
許州前戶部郎中侍御史劉元規年幾六  
十亦中選爲千戶至陳州余先子以前監  
察御史亦爲千戶自餘不可勝言旣立部  
曲須依軍例以次相鈐束物議喧然後亦  
罷之嗟乎以任子爲兵已失體況以朝士



全金詩卷二十一  
大夫充斯役乎當是時余以終場舉人獲免而先子以御史不免立法之弊以至於斯余赴試開封先子以詩送之且寄趙閒閒雷希顏有云老作一兵吾命也方聯七桂汝身之厚祿故人如見問爲言塵土困王尼二公覽之一笑

**補**歸潛志凡作詩和韻爲難古人贈答皆以不拘韻字迨宋蘇黃凡唱和須用元韻

往返數回以出奇余先子頗留意故每與人唱和韻益狹語益工人多稱之嘗與雷希顏元裕之論詩元云和韻非古要爲勉強先子云如能以彼韻就我意何如亦一奇也嘗在試院與屏山諸公唱和呂唐卿海藏齋詩舟字韻往返十餘首先子有云繡坼舊圖翻短褐朱書小字記歸舟屏山大稱其工用事也後居淮陽與劉少宣唱



和村字韻亦往返數十首少宣以爲全不覺用他人韻也

**補**歸潛志聯句亦詩中難事李屏山王正之聯句王云棘猴未窮巧穴蟻已失王人多稱之余先子留意聯句王長葛簿時與屏山張仲傑會飲坐中有定磁瓶因爲聯句先子首唱曰定州花磁瓶顏色天下白諸公稱之屏山則曰輕浮妾玻璃頑鈍奴

琥珀張則曰器質至堅脆膚理還悅澤後居淮陽冀京父來過雪夜聯句先子有云簾疎見飛英窓靜聞落屑又李欽叔來過李子遷在座會合聯句先子有首唱曰玉立兩謫仙鼎峙三敵國又云三強出奇兵八柱乃八克一老怯大敵三戰卽三北後自大梁歸陳與 聯句先子首云紅拋汴梁塵綠吸淮陽酒後令葉縣中秋夜與郝



訪州仲純王飛伯輩聯句具載蓬門集中

**附**

渾源州志劉摛至其曾孫登進士者若

汲若仲澤若侃若儼若從益從禹共八人  
嘗求書八桂堂於趙閒閒曰君家豈止八  
桂爲書叢桂窟歸之又曰渾源城南有翠  
屏山金狀元劉摛及右丞蘇保衡講學之  
地後人於此設書院

題蘇李合畫淵明濯足圖

天機本自足人事或相須東坡畫三昧迺與龍眠  
俱黃州富丘壑餘杭渺江湖已困口嘲弄更堪手  
糊塗其來本遊戲所到非功夫平生斜川翁尚友  
千載餘可聞不可見風標定何如笑倩李居士爲  
予巧形模臨流想有詩滄浪元非漁不入聲利場  
政恐吾足汗二公有深意百年留此圖不著色塵  
相澹然如游天地初主人牢緘滕丹青有渝此不

渝



過尉氏懷阮籍

朝來國門遊莫抵蓬池宿有懷阮步兵豪氣無檢束  
嘯歌陟高臺長風振林木老眼何曾青四海無一物  
萬古留詩名九原銷醉骨居然方丈家惜也微瑕玉  
塗窮道不窮先生安用哭

汎舟回瀾亭坐中作

昔年醉回瀾猶恨身屬官今年邂逅來身與亭俱閒  
洗心亭下水照眼亭西山溪山如故人喜我復

來還有酒澆我胸有花怡我顏韞鷹乍脫臂但覺  
天地寬山陰忽回船夜闌情未闌

樂山松

樂山一何崇上有千歲松清孤月露底秀拔天地  
中蒲柳抱常質桃李開芳容爭如十八公笑傲冰  
霜風居然喜避世不肯汗秦封蟠如北海螭伏如  
南陽龍紛紛過者多匠石終不逢明堂幾時構喚  
起蒼髯翁



和淵明雜詩二首

俗士苦紛競此心本無塵功名廼外物了不關吾  
身吾身復何有形神假相親天地開一室日月挾  
兩鄰有生卽有化如晏之必晨但得酒中了亦足  
稱達人揮戈欲却日小力自不量何如任天運閉  
門坐齊芳詩書列四隅著我於中央夏臥北窓風  
隆冬曝朝陽但有藜藿羹亦足充饑腸

少爲饑所驅老爲病所迫人生能幾何東阡復南  
陌急須沽酒來一笑舉大白浩歌草木振起舞天  
地窄同歡二三子誰主復誰客浮沉大浪中畢竟  
歸真宅歲月去何速老炎變新涼游子久不歸回  
首望大梁風埃慘如此何處真吾鄉野菊明落日  
林楓染飛霜勸我一杯酒悠然秋興長

和淵明始春懷田舍

家食自不惡菽水甘清貧學道未有得讀書亦良  
勤雖勤竟何補俛首愧古人靜言閱世故來者日



月新況復抱沉疴百憂無一忻安得衛生訣益我  
華池津况如一夢覺不與萬法鄰野人藉問我恐  
是劉遺民

和淵明飲酒韻

日入了公事援琴洗塵喧秋堂一燈明清響到夜  
偏彈罷枕書臥渺然夢青山山英向我問君駕何  
時還家僮忽喚覺惆悵不能言

臘日次幽居韻

世務方擾擾人生何營營不如不出門坐頤天地  
情泰中有否來陰極卽陽生掀髯一笑起窓外風  
鐸鳴看雲偶獨立踏雪時閒行最愛朝日升負暄  
向南榮

歲除夕次東坡守歲韻

人生都百年誰問鬪龜蛇容顏鏡中換老醜不可  
遮殷勤守此歲來歲復如何南鄰祭竈喧北里驅  
儺譁須臾罷無爲但聽樓鼓搗明朝四十過莫景



真易斜初心自慷慨白首還蹉跎寄語少年子雖  
健不足誇

次韻別歲

一日復一月其來不肯遲一冬復一春旣去誰能  
追問歲果安往惜不知津涯常於歲除夕知是相  
別時鄰翁慣禮餞買酒烹鮮肥百挽不得留一別  
那須悲年年例如此華髮吾何辭惟有學道心自  
覺老不衰

次韻餽歲

親朋餉無時鄰里歡有佐况當歲之終可以具百  
貨禮意各示勤手段不妨大我貧無往還閉戶但  
高臥藜藿且充腸珍味不登坐猶勝許文休衣食  
出馬磨自非揚子雲載酒何人過空吟餽歲詩自  
歌還自和

清和卽事用前韻

一度清明了一年溫風嫋嫋雨班班幾家繡幃尋



芳去何處蹇驢馱醉還宿草新墳驚世短落花流水占春閒曉鶯啼破松窓夢缺月東南挂屋山

五月十四夜對月有感

世事易隨雲變滅人生難保月團圓淮陽旅舍三年夢河朔風聲五月寒何處雲山端可老向來天地爲誰寬宦游脚底生荆棘蜀道而今却不難

再過鄆城示伯玉知幾

三年兩度過澉陽鞍馬紅塵道路長花月不應知

我老溪山也解笑人忙朔風凜凜頻驚座夜雨蕭蕭偶對牀他日水南營葬地愧無遺愛在桐鄉

次韻閒閒公夢歸

眉閒喜色幾時黃滿貯羈愁著瘦腸萬里鄉關飛不到十年岐路走空忙盃心蘸月松梢影鼻觀通風柏子香最愛南山舊山色夢中相覓不相忘

題閒閒公夢歸詩後用叔通韻

學道幾人知道味謀生底物是生涯莊周枕上非



金鑑詩卷二十  
十一  
真蝶樂廣杯中亦假蛇身後功名半張紙夜來鼓  
吹一池蛙夢閒說夢重重夢家外忘家處處家

送儀提點西歸

自斷平生不問天拂衣歸去任吾年五侯鯖飽無  
多味九老圖成又一傳回首京華瞻日遠放懷鄉  
社得天全綸巾醉臥咸陽市始信人間有散仙

再賡

人定端能坐勝天刀圭有力制頽年道非出世頭  
頭是丹不遺經口口傳陰魄沉迷終鬼錄陽精飛  
鍊卽神全三山縹緲誰能到目下身安亦是仙

次韻李公度

餅有儲糧鬢有絲蹉跎歲晚坐書癡輞川畫隱王  
摩詰錦里詩窮杜拾遺應舉尚陪新進士主文半  
是舊相知春闈看決魚龍陣未必尖椎勝鈍椎

題無盡藏

梁斗南  
所藏畫

誰開天地祕密藏今古人閒用不窮眼底搖光千



金鑑詩卷二十一  
丈月耳根傳響一溪風勝游赤壁文章在高臥燕  
山氣象同二老風流渺何許後生猶可畫圖中

三弟手植瓢材且有詩予亦戲作

爲愛胡盧手自栽弱條柔蔓漸縈回素花飄後初  
成實碧蔭濃時可數枚試問老禪藤繳去何如游  
子杖挑來早知瓠落終無用只合江湖養不才

次韻三弟贈南庵老人

一庵盤礴勝巢仙不入叢林恰是禪花圃蓮塘閒

打景粥盂齋鉢老隨緣忘言已了八千偈適意更  
揮三兩絃邂逅我來推不去坐分一半好風煙

次韻劉少宣

旅窓蝶夢曉驚回默數流年祇自哀與世迂疎甘  
袖手及身強健且銜杯桐凋翠葉看看盡菊著黃  
花旋旋開杖屨南庵訪幽事秋光滿眼送詩來

酬李子遷

曾著朱衣侍冕旒忽乘羸馬出皇州青山有約攜



全金詩卷二十一  
琴往白髮無成把鏡羞却笑張儀誇舌在不妨巢  
父有詩留柳湖莎徑東南夢又見見童迓細侯

過洧川次侯生君澤韻

誰能孤憤效韓非且喜玄微對鏡機出得山來無  
遠志寄將書去有當歸閒居已判平生了真賞從  
教舉世稀日咀道腴深有味更須口腹事甘肥

聞蜚用少陵韻

唧唧不堪聞村居更惱人青衫傷久客華髮念雙

親歲莫那逢雨秋宵未向晨石心猶可轉百感本  
來真

除夕用少陵韻

窓送迢迢漏燈開艷艷花正愁聞過鴈久客羨棲  
鴉放眼春猶好驚心日又斜一蓑江上雨歸思浩  
無涯

卽事

臥疾劉公幹躬耕鄭子真溪山留好客天地許閒



人花醉紅沾袖松吟翠繞身撫心無所歎持此壽  
吾親

宋樓道中

十里羊腸路詰盤過花穿柳幾迴還馬頭忽轉青  
林角綠繞人家水一灣

過武丁廟

旱則爲霖水則舟若人端合夢中求荆王枕上陽  
臺雨板築英雄老死休

戲答侯威卿覓墨

萬松火厄化緇塵依舊徂徠雪裏春令劑香螺夔  
一足破慳分與畫眉人

宮中取張遇墨燒火去膠以之畫眉謂之畫眉墨

北園

碧梧斜影落胡牀白葛烏巾滿意涼宴坐不知紅  
日晚笋輿歸路麥花香

次韻答劉少宣

楊劉變體號西崑竊笑登壇子美村大抵俗儒無



正眼唯應後世有公言  
光生杜曲今千丈  
派出江西本一源  
此道凌遲嗟久矣  
不才安敢擅專門  
樂府虛傳山抹雲  
詩名浪得柳連村  
九原太白有生氣  
千古少陵無閒言  
登泰山巔小天下  
到崑崙口知河源  
如君少進可入室  
顧我今衰不及門

**附**趙秉文故葉令劉君遺愛碑  
吾友翰林脩撰王君從之  
有言君子有惠政而無異  
政史傳循吏而不傳能吏  
吾嘗誦之云爾

如吾葉令劉君既有惠政  
又有才幹稱可不謂全乎  
君諱從益字雲卿蔚之渾  
源人南山翁之胄也第進  
士任監察御史能知無不  
言與當途者辨曲直以罪  
去天子憐其才起爲葉令  
下車脩學校聳善抑惡一  
之日勵而教之二之日惠  
而安之奸吏惡少望風革  
面君曰未也事有大於此  
者葉劇邑也路當要衢餘  
入七萬餘石自擾攘



之後戶減三之一田不毛者千七百頃而  
賦仍舊可乎請於大司農減二萬石賴以  
濟流民自歸者數千未幾被詔百姓詣都  
請留不果授應奉翰林文字踰月以疾卒  
遺民間之以端午罷酒樂設爲位而哭越  
明年使李道人來乞銘嗚呼非君之才之  
美之惠曷能使民旣去而挽留旣歿而不  
忘繼之以泣也哉乃爲詞以招之命曰悼



騷以慰父老之思其詞曰皇天賦予若人  
兮鍾南山之粹靈紛吾旣有此淑質兮又  
重之以脩能擷六藝之英華兮襲八桂之  
芳馨峩予冠之豸如今胡獨罹此謫也飛  
子鳥之鳧如今胡遽去此邑也蘭秀而摧  
兮玉貞而折也猗才之富兮胡壽之嗇也  
噫嘻將騎箕尾上比列星乎抑乘白鶴下  
顧遺民乎將爲景星鳳凰以瑞斯世乎抑



全金詩卷二十一  
爲祥風甘雨以濟斯人乎維此葉邑君之  
桐鄉魂兮歸來無去故鄉復銘其墓日維  
南山翁之曾孫以剛直聞百未一見槁死  
空墳二子邪旣秀而文將大其門耶噫

雷御史淵

二十九首

補四首

淵字希顏別字季默同知北京路轉運使  
事思之季子崇慶二年黃裳榜進士甲科  
釋褐涇州錄事徐州觀察判官召爲荆王  
府文學兼記室叅軍轉應奉翰林文字同  
知制誥兼國史院編脩官拜監察御史以  
公事免用宰相侯莘卿薦除太學博士還  
應奉終於翰林脩撰初在東平東平河朔



重兵處也驕將悍卒倚外寇爲重自行臺  
以下皆務爲摩撫之希顏蒞官自律者甚  
嚴出入軍中偃然不爲屈不數月閭巷間  
家有希顏畫像雖大將亦不敢新進書生  
遇之嘗爲戶部高尚書所辟權遂平縣事  
時年少氣銳擊豪右發奸伏一縣畏之稱  
爲神明及以御史巡行河南百姓相傳雷  
御史至豪猾望風遁去正大庚寅倒迴谷

之役希顏上書破朝臣孤注之論引援深  
切灼然易見而主兵者沮之策爲不行至  
今以顧望爲當國者之恨希顏三歲喪父  
七歲養於諸兄年十四五貧無以爲資乃  
以胄子入國學便能自樹立如成人不二  
十游公卿閒太學諸人莫敢與之齒渡河  
後學益博文益奇名益重爲人軀幹雄偉  
髯張口哆顏渥丹眼如望羊遇不平則疾



惡之氣見於顏間或嚼齒大罵不休雖痛  
自摧折然粹亦不能變也生平慕田疇陳  
元龍之爲人而人亦以古人期之故雖以  
文章見稱在希顏仍爲餘事耳

**補**歸潛志雷翰林淵字希顏應州渾源人  
與余同里閨且姻家也父思西仲名進士  
仕至同知北京轉運司註易行於世公幼  
喪父以孤童入太學讀書晝夜不休雖貧

甚不以介意從李屏山游遂知名俄中高  
第調涇州錄事坐高庭玉獻臣之獄幾死  
後改東平遷東阿令授徐州觀察判官興  
定未召爲英王府文學俄入翰林爲應奉  
拜監察御史言五事稱旨又彈劾不避貴  
臣出巡都邑所至有威譽凡奸豪不法者  
立箠殺之坐此爲小人所訟罷去久之起  
爲太學博士南京轉運司戶籍判官遷翰



金言卷二十一  
林修撰一夕卒年四十八公博學有雄氣  
爲文章專法韓昌黎尤長於序事詩雜出  
坡谷喜新奇好收古人書畫碑刻藏於家  
甚富喜結交凡當塗貴要與布衣名士無  
不往來居京師賓客踵門未嘗去舍後進  
經公品題以爲榮家無餘貲及待賓客豐  
腆甚蒞官喜立名初登第攝令遂平一邑  
大震嘗笞州魁吏州檄召不應罷去後凡

居一職輒震耀亦坐此仕不達然士論未  
嘗不壯之嘗爲文祭高公獻臣其詞高古  
一時傳誦工於尺牘辭簡而甚文朋友得  
之輒以爲珍藏發書頃刻數十軸皆得體  
可愛在館與諸同年友制辭皆擬其不及  
以箴之如誥商衡平叔云將迎閒有亦須  
風節之自持誥聶天驥元吉云讀書大可  
益人宜勤講學人皆傳之初善李屏山後



善馮公叔獻後善高公獻臣最後善趙公  
周臣陳公正叔早與余先子交嘗同鄉校  
同太學後同朝先子歿公寄挽詩有云鄉  
校聯裾春誦學上庠同榻夜論心余因請  
爲墓誌迄今余家有公書簡甚多也善飲  
啗未嘗見大醉酒閒論事口吃而甚辯出  
奇無窮真豪士也

**補**歸潛志雷翰林希顏爲人作碑誌雖稱

其善德其疵短亦交見之嘗曰文章止是  
褒與貶初作屏山墓誌數處有微言劉光  
甫讀之不能平與宋飛卿交勸令削去今  
刻石猶存浮沉於酒其性厭怠有不屑爲  
之言余謂碑誌本以章其人之善雖不可  
溢美有愧辭然當實錄其善事使傳信後  
世若疵短則不當書也況非作史傳何貶  
焉其子孫覽之豈得自安也



金言卷二十一  
補歸潛志宣宗喜刑法政尚威嚴故南渡  
之在位者多苛刻徒單右丞思忠好用麻  
椎繫人號麻椎相公李運使特立友之號  
半截劍馮內翰壁叔獻號馬劉子後雷希  
顏爲御史至蔡州得奸豪杖殺之五百人  
又號雷半千又有完顏麻斤出蒲蔡咬住  
皆以酷聞而蒲蔡合住王阿里李渙之徒  
胥吏中尤狡刻者也

補金史希顏庶出年最幼諸兄不齒父思  
歿不能安於家乃發憤入太學衣敝履穿  
坐榻無席自以跣露恒兀坐讀書不迎送  
賓客人以爲倨其友商衡每爲辨之且周  
卹焉

雲卿父子有宛丘之行作二詩爲餞

陽春到上林百卉紛白紅岸谷稍敷腴溪光亦沖  
融獨有石閒栢不落鼓舞中期君如此木歲晚延



清風

漢庭議論學傾耳待歆向君家賢父子千載蔚相望讀書二十年閉戶自師匠異端絀偏雜陳言刊猥釀剛全百鍊餘氣出諸老上頽風正波靡去去作隄障

京叔將拜埽於陳徵言爲贈老嬾廢學茫無所得獨記其與屏山雲卿襟期所在者非以爲詩也

梁苑池塘生綠烟吹臺草色春芊芊故人幽局閉長眠氣槩英英猶眼前陽春無力蘇重泉孝子感時涕泗漣匍匐歸埽淮陽阡徵子贈別意拳拳我自頑鈍須人鐫安能視後輒子鞭姬情孔意星日懸幹旋萬化中持權斯文興喪實關天尋常墨客技藝然醫巫星曆相比肩何用雕琢空徂年卽今海縣謾腥膻獨挽洙泗可洗湔迺公有志屏山賢二豪在日子牽連傷哉未售墳已顛老我欲種南



山田子之兄弟其周旋事業絕勝空言傳

同裕之欽叔分韻得莫論二字

幼安謝辟命子雲老寂寞趨嚮豈獨異時命非所  
度我久困流離一屢求負郭雖無斬敵功尚舉力  
田爵崧少啓吾封四履盡伊洛有客來問津醉眼  
入寥廓世事久閉眼終日只睡昏清風何處來佳  
客已在門倒屣往從之玉色向我溫妻孥趣作具  
歡喜傾瓶盆清夜襍被往共就遺山元嘲諢及俳

語發揮閒微言懸斷漏天樞高嘯驚鄰垣脗合政  
相和意到俄孤蹇恨不倒困廩矧肯留籬樊棄屨  
獲珠玉披榛見蘭蓀我肱已三折醉墮偶全渾知  
無適俗韻量力任灌園二君清廟器巾幕華罍罇  
蒼生望休息朝廷待崇尊出處旣異途會合難預  
論此樂未易得此夕勿憚煩白酒舉初子黃雞溷  
諸孫水樂喧後部山鬟秀前軒一醉萬事休商聲  
滿乾坤



會善寺松

物生自有常怪特物之病嗟嗟此老蒼怪怪生魁  
柄侏儒蹙髀股宿瘤擁腮頸蜿蜒蛟龍戲騰擲  
虎競鬚髯喜張磔意氣怒狂迸匠石求棟楹節目  
足譏評芻蕘急薪樵堅悍空盼瞪靜言觀倚伏未  
易相弔慶雖違時世用顧免斤斧橫陽秋莫榮悴  
歲月何究竟盤盤曲則全挺挺獨也正小草悞埽  
迹伏神還守性儻隨天中景廣宇共庥暎

玉華山中同裕之分韻送欽叔得歸字

洗耳潁川水療飢西山薇山川得佳客草木生光  
輝末路風教薄此道日已微相期千載事非君誰  
與歸

九日登少室絕頂同裕之分韻得蘿字

閒居愛重九佳人重相過登高酬節物少室鬱嵯  
峨迤邐謝塵土夷猶出烟蘿欵如據鰲頭萬壑俯  
蜂窩浩浩跨積風瀾瀾渺長河日車舛紅輪天宇



疑蒼波指點數齊州始覺氛埃多我無倚天劍有  
淚空滂沱驚鱗盼奧渚倦翼占危柯悔不與家來  
結茅老巖阿歸途睠老阮廣武意如何

月下同飛伯觀畦丁灌園得畦字

村居鄰老圃喘汗憫夏畦輓轡健晚涼月輪轉天  
蹊刻刻金融溝涓涓水泮溪黃萎漸蘇息綠潤俄  
淒迷生意續夜氣甘滋淡新萸風露觸處香河漢  
望中低野人無遠謀且喜豐食鮭雖愧下帷董稍

悟養生嵇歸懷自浩然流光挹平西

濟南珍珠泉

大地萬寶藏元冥不敢私抉開青玉罅渾渾流珠  
璣輕明疑夜光潔白真摩尼風吹忽脫串日射俄  
生輝有時如少靳鬻沸却纍纍風色媚一川老蚌  
初未知君看一日閒巧歷所不賞遊人隨意滿不  
畀乾沒兒吾謂歷下城繁華富瑰奇貪夫死專利  
帝意憐其癡故露連城珍可玩不可幾若曰天壤



金詩卷二十一  
閒所遇皆汝資何必秘篋笥自貽伊瑕疵詩成一  
大笑臆說量天機

讀孔北海傳

漢室風流絕建安老瞞父子力排山可憐魯國真  
男子也着區區七子閒

賦侯相公雲溪

相公襟度本汪洋戲鑿陂池便渺茫解起晴雲作  
霖雨更邀明月貯清光千重複嶺藏仙境萬斛香

泉釀醉鄉畢竟麟符拋不得烟波空效五湖蒼

贈陳司諫正叔

洗兵有志挽天河補袞剛留諫諍坡賦出石腸還  
婉麗政成鐵面却中和寒侵桃李淒無色雪壓池  
塘慘不波急手罇前謀一醉六街塵土浣人多

濟南汎舟水底見山有感而作

南山已在風塵外更恐飛埃浣碧巔一棹晚涼波  
底看浴沂面目本天然



洛陽同裕之欽叔賦

日上烟花一片紅崧邨西峙洛川東纔聞候騎傳  
青蓋又見牽羊出絳宮事去關河不橫草秋來陵  
寢但飛蓬書生不奈興亡恨斗酒聊澆魄磊胸

啓母石同裕之賦

千古崩崖一罅開強將神怪附郊禰無情頑石猶  
胎謗貝錦從爲巷伯哀

贈答麻信之

并序

麻弟避兵渡河徑謁裕之於崧高夤緣一見  
相與之意甚厚旣留數日又將過吾景玄於  
女儿之陰維元劉國士也而弟游於其閒則  
弟之爲人可知已臨行復長歌相贈清平豐  
融蓋他日未易量也愛養不足詩以誦之  
五老英靈未陸沉一枝高秀出詞林珪璋自是清  
朝器律呂偏諧治世音此去文章足知己後來功  
用只齋心濟時相約元劉了索我雲山深復深



雪

風定雲仍暖天圍四顧低紛紛俄攪野浩浩欲平  
溪樵擔歸時重漁舟望處迷饑鴉空繞樹若箇可  
安棲

宮鴉

萬樹瓊芳鎖漢宮羣鴉容與五雲中曙光先背朝  
陽日春信頻呼禁籞風青鬢巧梳欣一色秀眉學  
畫鬪新工鳳樓未訝啼聲切愁滿長門信未通

洮石硯

緹囊深複有滄洲丈石春融翠欲流退筆成丘竟  
何益乘時真欲礪吳鉤

馬上見桃花

三衢鞍馬苦塵腥忽見溪桃倦意醒未必施朱便  
麤俗最憐滌露出娉婷城東詩老圖幽絕水上仙  
郎記窈冥何似玉堂留故事賣花擔上有丹青

叔獻兄歸隱崧山有詩見及依韻奉寄



幾百千年一敬通飄飄歸袂振孤風平生自處神明在衰俗無從議論公韶劄向來儀彩鳳弋繒何苦慕冥鴻他年杖屨相尋處三十六峰雲霧中

劉御史雲卿挽詞二首

氣幹參天擬萬尋聖門梁棟自堪任豸冠嶽嶽鋒稜峻鳧舄翩翩惠愛深可忍佳城玉埋土最哀慈幄血霑襟傳家賴有雙珠在不爾何如慰士林少同里閭早知音投分交情雨舊今鄉校聯裾春

誦學上庠連榻夜論心南山松柏愁霜殞北地乾坤恨日侵不得生芻躬一奠西風吹淚滿衣襟

題黃華江臯烟樹二首

疎柳靜茅亭亭下長江路不見亭中人蕭蕭烟景莫

江山萬里眼一亭畧約之黃華未死在看取畫中詩

送李執剛致仕歸洛



金言卷二十一  
漕計中興屬老成引年陳請獨崢嶸果能辨此公  
真勇愛莫留之我愴情塵空恐驚黃鵠舉烟波不  
負白鷗盟洛陽去去春如錦晝日神仙看地行

梨花得紅字

雪作肌膚玉作容不將妖艷嫁東風梅魂何物三  
春在桃臉真成一笑空雨細無情添寂寞

無情亦作淚痕

月明有意助豐融

有意助亦云真態更

相如病渴妨文賦想

像甘寒結小紅

河山形勝圖

高峯巨壑與天連中國關防表裏全北岸塵氛重  
回首不如圖上看風煙

次裕之韻兼及玄景弟

名腸相煥半成灰戰退紛華旆始迴文字喜逢修  
月手津梁愧乏濟川材等閒有酒輒共醉信口哦  
詩不置才最憶平生劉子駿紫芝可惜不偕來

愛詩李道人若愚崧陽歸隱圖



我愛崧前凡再暮詩僧騷客相追隨春葩繽紛香  
澗谷夏泉噴薄清心脾霜林置酒曳錦障雪嶺探  
梅登玉螭重陽夜宿太平頂天雞夜半鳴喔咿整  
冠東望見石出金輪湧海光陸離神州赤縣入指  
顧風埃未靖空噓歛窮探極覽不知老泉石佳處  
多留題簡書驅出踏朝市期會迫窄愁鞭笞襟懷  
塵土少清夢齒頰棘荆真白癡叩門剝琢者誰子  
道人面有熊豹姿披圖二室忽當眼貫珠編貝多

文辭我離山久詩筆退摹寫豈復能清奇再三要  
索不忍拒依依但記經行時道人愛山復愛詩嗜  
好成癖未易醫山中詩友莫相厭遠勝薰酣聲利  
乾沒兒

松庵

菴中偃臥龍閱世鬚髯古人天共護持半夜起風  
雨

過華山懷陳希夷



五季乾坤半晦冥先生有意事澄清  
齟齬四十年來睡開眼東方日已明

梅影

維摩丈室冷於冰千劫蕭然無盡燈  
天女散花愁不寐夜深高髻影鬢鬢

紫芝峪

仙徑玄雲覆靈芝紫氣浮朝霞屯錦蓋  
春雨潤珠旒蘭有香偏襲苔無色可侔  
如何采真客辟穀費

冥搜

**附**恒岳志紫芝峪在望仙嶺東北常產紫  
芝故名金雷淵有詩



御訂全金詩增補中州集卷二十一

金元好問原本

常山周昂 一百首 補二首

昂字德卿真定人父伯祿字天錫師事玄

真先生褚承亮 承亮字茂先宣和六年擢第調易州戶曹會皇子郎

君破真定拘境內進士七十二人赴安國寺試策策目上皇不道少主失信舉人希



旨極口毀詆茂先離席揖主文劉侍中言  
君父之過豈臣子所當言長揖而出劉爲  
之動容比榜除茂先被黜餘悉放第狀元  
許必輩自號七十二賢榜帥府重其名檄  
茂先以易州司戶知稿城漫一應之尋  
解印去年七十終弟子諡爲玄真先生  
大定初第進士仕至同知沁南軍節度使事  
德卿年二十一擢第釋褐南和簿有異政  
遷良鄉令入拜監察御史路宣叔以言事  
被斥德卿送以詩坐謗訕停銓久之起爲  
龍州都軍以邊功得復召超三司判官大

安軍興權行六部員外郎德卿傳其甥王  
從之文法云文章工於外而拙於內者可  
以驚四筵而不可以適獨坐可以取口稱  
而不可以得首肯又云文章以意爲主以  
字語爲役主強而役弱則無令不從今人  
往往驕其所役至跋扈難制甚者反役其  
主雖極辭語之工而豈文之正哉德卿初  
有常山集喪亂後不復見從之能記三百



全金言卷二十一  
二  
餘首因得傳之屏山故人外傳云德卿以  
孝友聞又喜名節藹然仁義人也學術醇  
正文筆高雅以杜子美韓退之爲法諸儒  
皆師尊之旣歷臺省爲人所擠竟坐詩得  
罪謫東海上十數年始入翰林言事愈切  
出佐三司非所好從宗室承裕軍承裕失  
利跳走上谷衆欲逕歸德卿獨不可城陷  
與其從子嗣明同死於難嗣明字晦之短

小精悍有古俠士風年未三十交游半天  
下識高而志大善談論而中節作詩喜簡  
澹樂府尤溫麗最長於義理之學下筆數  
千言初不見其所從來試於府於禮部俱  
第一擢第主涑水簿從其叔北征得還而  
不忍去使晦之不死文字不及其叔而理  
性當過之嘗謂學不至邵康節程伊川非  
儒者也其說類此而天不假年悲夫



晚望

烟抹平林水退沙碧山西畔夕陽家無人解得詩  
人意只有雲邊數點鴉

香山

山林朝市兩茫然紅葉黃花自一川野水趁人如  
有約長松閱世不知年千篇未暇償詩債一鉢聊  
從結淨緣欲問安心心已了手書誰識是生前

有感

壯心未分逐流年衰鬢從渠衆目憐却恨詩情消  
滅盡語言枯淡到中邊

冷巖行賦冷巖相公所居

冷巖賢宰相宗  
室永貞自號也

或爲孟或爲鍾人心自異山本同天清雲遠望不  
極小孤宛在江流中澗之毛可筐筥山之木可斤  
斧唯有白雲高崔嵬風吹不消自太古峴山何奇  
羊子所攀東山何秀謝公往還今爾胡爲藉甚乎  
人間吁嗟乎冷山



早起

覆斗臨霜閣號鐘滿夜城  
飛揚他日事去住此時  
情文字 留滯塵沙管送迎  
百年今已半凜凜畏  
虛生

曉望

曉樹雲重隱春城日半陰  
蒼茫塵土眼恍惚歲時  
心流落隨南北才華閱古今  
柴荆生事窄寧憶二  
疏金

羈旅

羈旅情方慘暄寒氣尚膠  
谷風連遠陣原樹鬱春  
梢要路嗟何及浮名久已拋  
百年麤飯在真欲事  
誅茅

早春

小雪寒仍在烟花意已深  
老侵長路鬢春蕩故園  
心幸可追沂詠何勞費越吟  
微躬應自愛莫作愧  
千金



雪

小雪莫能繁愁雲夕更昏細燈寒出戶欹樹老當  
軒竹葉舊時釀梅花何處村賦詩空入夜愁絕與  
誰論

雨過

雨暎高簷過山開晚日明動雲方潰擁號水未休  
爭沙岸黿鼉出荒庭鶴鶴行草泥沾屐齒杖策有  
餘清

晚步

鬱鬱孤城隘飄飄絕塞游短衣忘遠步高興會清  
秋白水深樵谷黃雲古戍樓居人半裘毯橫管莫  
生愁

夜

門巷溪聲爽衣裳夜氣蘇地清林影散月靜桂花  
孤左省詩頻詠南樓興不辜關山冰雪裏何處覓  
天隅



晚望

疊嶂何時出荒城落日低音書雲去北烽燧客愁  
西鷹隼乘秋擊狐狸倚莫啼吟詩且排悶佳句敢  
攀躋

獨酌

渺渺清溪濶悠悠弱藻沈客衣臨水靜鳥影過船  
深暫把魚竿坐因知靜者心滄洲高興動巢父可  
東尋

秋夜

高閣鐘初殷層城月未光淨空含宇大臥斗帶星  
長暗覺巢鳥動清聞露菊香誰家砧杵急應怯莫  
天涼

對月

月近天河白秋深夜氣清蛛絲時隱見兔杵正分  
明敲帽中宵落孤舟幾處行清風殊未發樹穩鵲  
休驚



促織

促織來何處秋風暗與期苦吟人不解多恨爾如  
知獨枕難安夜寒衣欲及時凌晨攬清鏡一半已  
成絲

溪南

小徑通沙穩清溪帶樹深岸危低白屋雲近沒青  
岑灑落高秋氣飛騰志士心雲臺與麟閣莫遣二  
毛侵

繼人韻

高興秋方逸幽居晚見過歡交寧厭數詩好不論  
多五字含風雅千篇費琢磨自知才力拙相報欲  
如何

送李天英下第

不須寂寞恨東歸洗眼三年看一飛試捲波瀾入  
毫穎莫教歐九識劉幾

宿西藍



聞道西藍好能來定有緣青山避喬木流水信平  
田步屨迷深竹題詩惜莫烟塵心厭翻倒一室暫  
安禪

北湖清明

碧水隨時酒春風著處花歡娛萬國本富貴五侯  
家金動樓頭管香迴日莫車老夫唯欲睡兒女莫  
相誇

中秋夜高陽對月

端正高陽月空庭又見過清風禁睡得白髮奈愁  
何尚識王良策難知織女梭金波流汨汨應爲照  
滹沱

丘家莊早發

渡馬危橋立村雞暗樹號星稀白水濶霧重黑山  
高外物誰能必人生會有勞鷓鴣終變化早晚藉  
風濤

邊月



邊月弓初滿山城角尚孤中天看獨立永夜興誰  
俱未覺風生暈空懷斗轉隅含情知白兔欲下更  
踟躕

侍祠太室

設燎彤庭敞懸燈玉殿深星河含爽朗城闕動陰  
沈祇慄誠初薦馨香德已歆清風動雲幕有喜見  
神心

夜步

擊柝隣居靜開門宿鳥驚西風秋半急北斗夜深  
明獨立乾坤大徐行杖履輕遙憐漢宮闕重露濕  
金莖

宋文貞公廟

開元四荒不動塵柱石中原有老臣襄土一丘松  
栢暗長安三日荔枝新

讀陳後山詩

子美神功接混茫人間無路可升堂一斑管內時



時見賺得陳郎兩鬢蒼

偶書

幽陰不放終年樹好味仍餘盡日茶詩業未降心  
有種世緣初盡眼無花

失子

白髮飄蕭老病身幾因兒女淚沾巾虛談誤世王  
夷甫只有情鍾語最真

北行卽事二絕句

聞道崑崙北風塵避僕窪至今悲漢節不合度流  
沙

五月分衣節三軍受甲時莫教麟閣將頻發羽林  
兒

邊月

驅車宿雙浦極目耿金波不有中秋景其如永夜  
何沙分疑白雪練失想明河桂樹元無意南傾獨  
好柯



晨起

鼓聲隨曉角合杳起平荒宿火連岡小寒星墮水  
長鯨翻驚日動馬食快宵涼白首登壇將功名好  
自強

西城道中

草路幽香不動塵細蟬初向葉間聞溟濛小雨來  
無際雲與青山淡不分

醉經齋爲虞鄉麻長官賦

詩書讀破自融神不羨雲安麴米春黃卷至今真  
味在莫將糟粕待前人

清放齋

平生眼白嫌物俗此身誰要冠帶束茶甌飯飽一  
飲足臥聽松風仰看屋

孫資深歲寒堂

世態浮雲日夜移春蘭秋菊各爭時此心鐵石無  
人會唯有庭前栢樹知



登綿山上方

環合青峰插劍長，小平如掌寄禪房。  
危闌半出雲霄上，祕景盡收天地藏。  
野濶羣山驚破碎，雲低滄海認微茫。  
九華籍甚因人顯，迴秀可憐天一方。

謁先主廟

暗粉陳丹半在亡，短垣殘日共悲涼。  
不須古碣書綿竹，自有荒村紀葆桑。  
塵土衣冠曾繫馬，歲時歌舞亦稱觴。  
不應巴蜀江山麗，能使英靈忘故鄉。

送客

相見席不暖，送行情更牽。  
只愁人面隔，不放馬蹄前。  
塞迴雲垂地，溪平水接天。  
山川後期濶，把臂兩茫然。

莫州道中

大陵河東古莫州，居人小屋如蝸牛。  
屋邊向外何所有，唯見白沙纍纍堆山丘。  
車行沙中如倒拽，風驚沙流失前轍。  
馬蹄半跛牛領穿，三步停鞭五步



歇雞聲人語無四鄰晚風蕭蕭愁殺人人有禱沙  
應神遼東老兵非使臣何必埋却雙行輪

卽事二首

憂患年來坐讀書田園拋却任荒蕪目前却得晨  
昏力碌碌無由似阿奴

遠日傷心千里餘凜然真覺近狼須雲邊處處是  
青塚馬上人人皆白鬚正憶荒村臨古道不堪獨  
樹點平蕪誰人與話西園路梅竹而今似畫圖

感秋

秋氣入行帳愁人中夜知雞聲與人語耿耿異常  
時清晨起危坐感歎不自持義和馭飛轂往返無  
停期春草如昨日已復悲離離顧謂鏡中髮爾衰  
安得遲結束媚鞍馬荒山去委蛇黃花泣宵露綠  
野含晨曦吾事久不諧悠悠隨所之有懷南澗約  
敢賦北山詩

對月



月滿秋仍早臺高夜未徂水光先剡淡星影失脚  
躡玉帳傳更急荒城擊柝孤去年雙淚眼依舊入  
平蕪

鵲山

西征疲短服北望慘衰顏再宿殊雞舍相看獨鵲  
山旆沾新雨過鳥逐暮雲還白首瞻星漢何時鼓  
角閒

望山中松

地險蟠根古人稀小徑消雨皴開白雪風響入青  
霄未畏斧斤逼惟愁霹靂燒解鞍那避遠冷色故  
相招

利涉道中寄子端

行武昌望利涉高青烟低白雪岡陵瀰漫溝澮滅  
氤氳冷日從東來照我清影忽作溪水臥明月凌  
兢羸馬歎蝟縮詰曲微行蛇腹裂遺鞭脫鐙初不  
知指僵欲墮骨欲折氊裘毛襪良可念我自無備



誰從輟人家土塌借微暖坐久清冰落鬚頰黃花  
臞仙怯風馭久向笙歌窟中蟄徑須持此遠相餉  
一洗夜堂花酒熱

卽事二首

不堪華髮半頭生老去偏添愛嫵情新得家書來  
報喜舊時龜子遶牀行

一牀安置似僧居白髮忘梳動月餘嬾性漸成愁  
把筆小詩常擬倩人書

九日

不堪馬上逢佳節況是天涯望故鄉高會未容陪  
戲馬舊游空復憶臨香癡雲黯黯方垂地小雪霏  
霏欲度墻猶賴多情數枝菊肯留金盞待重陽

對月

萬里寥天月相隨不憚勞屢添華髮滿曾傍黑山  
高影動新瓊杵光含舊寶刀嫦娥應見訝獨宿弊  
綈袍



全金言卷二十一  
翠屏口七首

去歲翠屏下東流看湧波愁將新鬢髮還對舊關  
河翅健翻秋隼峰高並晚馳草深饒虎跡夜黑欲  
誰過

玉帳初鳴鼓金鞍半偃弓傷心看寒水對面隔華  
風山去何時斷雲來本自通不須驚異域曾在版  
圖中

野蔓梢馳架輕泥濺馬鞍徑斜來險石溪急上清  
灘羽檄千山靜羔裘六月寒長松空夾道蕭颯不  
成看

旌節瞻前帳風塵識舊坡眼平青草短情亂碧山  
多晚起方投筆前驅効執戈馬蹄須愛惜留渡北  
流河

萬里來崩豁終年氣慘悽地窮青澗斷天近玉繩  
低孛窟黃沙北崑崙白雪西故園何處覓搔首意  
空迷



塞古秋風早山昏落日低積雲鴉度久荒岸馬歸  
齊燈火看時出茅茨漸欲迷塵沙恨於役況乃對  
雞棲

地擁河山壯營關劍甲重馬牛來細路燈火出寒  
松刁斗方嚴夜羔裘欲禦冬可憐天設險不入漢  
提封

邊俗

返闔看平野斜垣逐慢坡馬牛雖異域雞犬竟同

窠木杵春晨急糠燈照夜多淳風今已破征歛爲  
兵戈

山家七首

秋日山田熟山家趣轉奇壠苞銀粟綴墻蔓綠雲  
垂野飯留佳客青錢副小兒主人愁喪亂數數問  
邊陲

蕭颯晚風涼高杠引旆長嶺雲殘宿陣陵日湛晨  
光已作依劉表終須問葛疆俯身馳萬里未覺鬢



毛蒼

年深師欲老秋至敵還輕但使財思義猶多死易  
生指揮無險阻感激在精誠萬古麒麟閣何曾浪  
得名

簡易軍中事川原入望多草平鋪碧錦山遠出青  
螺遠愧桃花水重臨杏子河去年關塞意蕭颯起  
悲歌

赤磻蟠雙闕青山壯一門放歌遊遠目箕踞得高

原地險勞天設邊戈厭口屯廟謀新控扼萬里可  
雄吞

官舍暫投轄塞垣還着鞭路移新歲月心醉好山  
川方丈何由到桃源恐浪傳相看不隔水遺恨惜  
他年

翡翠長松秀氍毹細草斑屢經新渡水不數舊看  
山太華愁登陟終南費引攀豈知圖畫景長在馬  
蹄閒



北行二首

卸鞍休馬倦解橐罷馳鳴細雨侵衣急長郊入臥  
平溪喧看水滿山黑厭雲生莫怪龍行數應知欲  
洗兵

比歲頻分甲今年賀息兵競誇新戰士誰識舊書  
生北塞甘長別南天欲遠征二年迎復送空媿泰  
州城

山丹花

浪藥誰能記山丹舊所聞卷花翻碧草低地落紅  
雲塞雨沾衣久溪風入把勤莫言羌婦醜誰識漢  
昭君

春日卽事

凍柳僵榆未改容狐裘貂帽尚宜風欲尋把酒渾  
無處春在鳴鳩谷谷中

寄金山長老

庭前雙栢樹作別似晨朝書信隨溪茗音聲落海



潮嶺雲閒可翫邊月苦無繆相見愁他日風沙兩  
鬢凋

寄王子明

病起身仍嬾眠多意尚迷筆成今夕把書似隔年  
題久恨心期阻難邀物理齊燈花應解事岑寂向  
人低

無題

西風吹白水日莫動寒威野帳收旗盡奚兒飲馬

歸梢梢聞鳥過慘慘見雲飛夜黑多豺虎荒村定  
敢依

萱草

萬里黃萱好風煙接路傍迹疎雖異域心密竟中  
央染練成初色移瓶得細香客愁無路遣始爲看  
花忘

得家書

窮愁非昔境白髮有深根淚破孤城郡書來萬里



村鴈聲寒日夜秋色老乾坤爲問遊方子何時慰  
倚門

書齋

夜雨書齋冷西風木葉拋暗蛩侵壞壁低鴈落寒  
郊壯志初嘗膽吾生豈繫匏草玄雖閉戶未用客  
相嘲

聞蟬

冥機辭委蛻天籟發幽嘶迴露增晨洗清風藉晚

攜暫成千里隔還作一枝低客思饒相觸愁時故  
不齊

晚陰不成

落日明西極高雲暗朔方樓臺分照耀宇宙一蒼  
茫不藉蛟龍便虛成燕雀忙何須遣雷怒鬱鬱繞  
高粱

竇氏園亭二首

雲樹春秋色風泉日夜聲過庭高幕暗吹簟轉雷



驚翠袖擎詩罷銀壺得酒傾平生耽野趣到此眼  
偏明

磴鑿蒼崖破池通碧澗流憩深憐洞室吟穩憶扁  
舟谷口堪高隱河梁厭遠遊卜居真此地幽寂更  
何求

卽事二首

南苑霓旌動繚牆天街蓮燭照修廊斗南絳氣風  
吹盡小雨濛濛濕建章

楊花顛倒入簾櫳睡鴨香殘碧霧空盡日尋詩尋  
不得鶉鴝聲在夢魂中

代書寄大元伯

南園臘蟻記同傾一紙書來萬里情日夜愁心隨  
柳色東風吹滿大梁城

和路宣叔梅

月底明肌粲壽陽道人呼入竹西堂安排臘味千  
鍾酒消破春風萬斛香花鳥有情應見惜蛾眉傾



金鑑詩卷二十一  
國故難藏西湖骨朽東坡遠又有君詩惱一場

新秋

畏日經時暑清秋一夕涼真堪近燈火不復病衣裳  
宋玉悲搖落安仁愧老蒼鄙夫那及此睡美百憂忘

靳子溫款春亭

曾數花鬚傍藥闌春風不到酒杯寬自憐白首荒  
三徑桃李年年檐上看

底柱圖

鬼門幽險深百篙人門逼窄逾兩牢舟人叫渡口  
流血性命咫尺輕鴻毛開圖頓覺風雷怒素髮飄  
蕭激衰腐河來天上石不移安得此心如底柱

寒林七賢

苦寒如此欲何之雪帽風裘意自奇縱有清詩三百首  
未應肯得党家兒

過省寬谷



金鑑詩卷二十一  
三  
嬰兒偃蹇正堪孩換得山西老將回往者不追來  
不戒莫將家世論人材

魯直墨跡

詩健如提十萬兵東坡真欲避時名須知筆墨渾  
闖事猶與先生抵死爭

讀柳詩

功名翕忽負初心行和騷人澤畔吟開卷未終還  
復掩世閒無此最悲音

憶劉及之

千株何處封君橘二頃誰家負郭田長路風塵空  
費日故園書札動經年未能免俗真聊爾不爲懷  
憂亦悄然襟抱何人與開釋論文除得老臞仙

家園

五畝園連竹三間屋向陽氣和春浩蕩心靜日舒  
長花鳥成相識琴書副兩忘陶然一罇酒誰復記  
義皇



晚望

獨立孤城上關山望不休異鄉驚絕域遠目豁清  
秋未擬登樓作空歌出塞愁故園飛鳥外溪水正  
南流

正月大風雨

風如渤海勢凌虛寒破貂裘力尚餘不是化工難  
倚賴也知青帝有驅除

弔張益之

當年讀書山堂中夜喜與君燈火同塵編壞簡如  
蠹攻弱質鄙鈍煩磨礪新詩如洗露芒鋒逸氣欲  
倒浮雲驄輕裘肥馬世上雄吾徒一飯嘗未充君  
如孔翠愁彫籠我亦哀鴻避鳴弓孤城一別天西  
東幾見黃葉飛霜風寄書無由魂夢通西望落日  
銜千峰他時雲雨儻相逢猶思驚雷起池龍鬼神  
無賴欺天公哀哉若人竟死窮自聞君亡阜生胸  
上訴九關無路從百年過眼如轉蓬夢時憂樂覺



卽空長夜漫漫何時終作詩寄哀投殯宮

別本長夜漫漫

何時終  
爲落句

### 題高歡避暑宮

百步風濤捲雪霜畫檐橫壁欲翱翔只應沙苑車  
歸後山水空青不解涼

### 樓桑廟

東市臍乾照夜脂雲龍風虎各乘時地中鼓角哀  
方捷天下英雄操已知壠畝見賢誰恨晚心中得

計不妨遲亦知漢祚難恢復輕擲荊州恐未宜

**附**

芹城小志縣山在昌平州東十五里或

名宜山元混一方輿勝覽載有縣山寺金

真定周昂題詩其上有云野濶羣山驚破

碎雲低滄海認微茫亦警句也



黃山趙灝

三十首

補一首

灝字文孺第進士明昌末終於禮部郎中  
性冲澹學道有得黃山其自號也閒閒趙  
公云黃山正書體兼顏蘇行草備諸家體  
趨放又似楊凝式當處黃魯直蘇才翁伯  
仲間党承旨篆陽冰以來一人而已而以  
黃山配之至今人謂之党趙有黃山集行  
於世涼陁云峩峩景明宮五雲湧蓬萊山



空白晝永野曠清風來放遠亭云晴日未  
消千嶂雪暖風先放一川花青天低處是  
平野白鳥去邊明落霞泰村道中云桃花  
都被風吹却楊柳似將烟染成其餘多稱  
此

**附**趙秉文題黃山書後予嘗評黃山書當  
在黃魯直蘇才翁伯仲間議者未必爲然  
今日李欽止來與余論合且云子美有宋

初詩人氣象涪翁圓熟若論氣韻當不相  
上下復觀竹溪跋公書云得法在魯公後  
得趣在魯公前三十年後當有知之者

晚宿山寺

松門明月佛前燈庵在孤雲最上層犬吠一山秋  
意靜敲門時有夜歸僧

僊和尚坐脫

識得從來覺性圓西歸隻履更翛然永嘉穩步曹



溪路臨濟飽叅黃蘗禪桶底脫時無一物機輪轉  
處有三玄火中留得一莖草依舊光明爍大千

黃山道中

小穀城荒路屈蟠石根寒碧漲秋灣千章秀木黃  
公廟一點飛雲白塔山好景落誰詩句裏蹇驢駝  
我畫圖閒膏肓泉石真吾事莫厭乘閒數往還

郊外

迥野饒秋色高臺半夕陽鷗眠沙渚靜鳥沒嶺雲

長薄宦違幽興浮生更異鄉歲華成白首丘壑愈  
難忘

貢院中懷山中故居

歲晚西溪路誰過舊草堂苔紋侵柱礎竹色度隣  
墻白首光陰疾青山意緒長相思老兄弟夜夜夢  
還鄉

貢院聞雨

燈暗風翻幔蜚吟葉擁墻人如秋已老愁與夜俱



長滴盡堦前雨催成鏡裏霜黃花依舊好多病不能觴

聚遠臺

獨上平臺上風雲萬里來青山一罇酒落日未能回

秋日感懷

歲月不相饒秋風颯已至蚊雷稍收聲團扇且復置久雨不宜人新涼差快意數篇東臯詩引我北

窓睡林泉久隔濶塵土作憔悴但有適人適何嘗事吾事一貧旣忘懷所好無不遂世無陶靖節何人知此味

用仲謙元夕詩韻

聞道藍田輞口莊欵湖前日具飛航李膺定已回仙棹王績無由入醉鄉薄宦繫人如坐井窮愁染鬢欲成霜早知上界多官府只向人間作酒狂

分韻賦雪得雨字



大雪初不知開門已無路驚喜視曆日此瑞固有  
數池冰凍欲合林鴉噤仍聚已成玉壺瑩尚作寶  
花雨造物固多才中有無盡句大兒擬圭璧小兒  
比鹽絮後人例蹈襲彌復入窘步聚星號令嚴亦  
自警未悟誰有五色筆繪此天地素好語覓不來  
更待偶然遇

和茂才韻

十年爲客未還家贏得毵毵兩鬢華別後故人應

念我不來踏雪看梅花

留題西溪三絕

誰開玉鑑瀉天光占斷人間六月涼日落沙禽猶  
未散也知受用藕花香

波光湛碧冷無痕眇眇輕風起縠紋認得朝來疎  
雨過却因水底見飛雲

總道西溪畫不如豈知造物用功夫蟾光忽作靈  
犀透表裏通明兩玉壺



九日懷尹無忌

茅屋秋蕭索幽居盡日閒碧雲看欲莫遠客幾時  
還書劍成何事風塵只強顏思君千里夢夜夜到  
燕山

立秋

日月如川流去矣不復回萬物各有營榮悴更相  
摧餘生苦多艱壯志久摧頽念欲學還丹鬱紆殊  
未諧今朝立新秋庭樹西風來舉首望天宇飛雲

獨裴徊呼兒且沽酒浩歌豁秋懷醉中得妙理逸  
興何悠哉

和崔深道春寒

長風忽落青林端風聲洶若江聲寒太陰盤礴亂  
天序推書撲筆成長歎美人何許媚幽獨使我不  
見心無歡頗聞隱居誦莊屈篷窓坐擁塵編殘琴  
歌酒賦兩寂寞懸知此興殊未闌遲君一來吐款  
要舉盃放目雲天寬



西城觀水

西山秋水來天地，巨野橫流浩無際。  
長風蹙浪鱗甲生，兩角斜分半山際。  
繚堤北去接飛橋，鼓鼙洶洶翻驚濤。  
中流突兀玉山起，直疑河伯驅靈鼇。  
冷光搖蕩秋雲白，渾似夢中遊震澤。  
隔林我欲喚漁郎，孤帆忽如過鳥翼。  
安得酒船常拍浮，四時甘味置兩頭。  
何人與我同此樂，潁陽試覓元丹丘。

盆池荷花

一泓寒碧甃波光，雨後妖紅獨自芳。  
不許纖塵汗天質，政須清吹發幽香。  
洛神初試凌波襪，妃子來從礪石湯。  
休笑埋盆等兒戲，要令引夢水雲鄉。

扈從車駕至荆山

海上飛來碧玉峰，瑤林琪樹更青蔥。  
參差樓觀浮雲表，顛倒山光落鏡中。  
侍從有臣司碧落，笑談無處不清風。  
好分靈沼爲膏澤，乞與人間作歲豐。

中秋



秋氣平分月正明  
藥珠宮闕對蓬瀛  
已驅急雨消殘暑  
不遣微雲點太清  
簾外清風飄桂子  
夜深涼露滴金莖  
聖朝不奏霓裳曲  
四海歌謳即樂聲

史舜

元嘗從文孺學詩說道陵中秋賞月瑤光樓召文孺對御賦詩以清字為韻道陵讀至落句大加賞異手酌金鍾以賜且字之曰文孺以此鍾賜汝作酒直士林榮之高祖言吾不如子房君父字呼臣下不為無故事也

### 題齊物堂

至人識破浮生理  
萬變何嘗有不同  
果蝶夢周周

夢蝶為風乘我我  
乘風得時未必全  
無識窮處方知却有通  
畢竟欲齊齊底物  
世閒元是一虛空

### 秋郊晚望

桃竹猶堪杖幽尋  
興頗嘉池荷能幾  
葉籬菊不多  
花地坼成龜兆  
林枯出犬牙  
村農慶豐歲  
社鼓已

三搗

### 元日

馬上逢元日  
東風送客愁  
滹沱春水渡  
瀛海夕陽



樓雪照潘郎鬢塵侵季子裘勞生已強半更欲玷  
清流

過良鄉縣學

儒宮宜地僻竟日有餘清殿古碑仍在庭空草自  
生風高時脫木雲重欲摧城客興已瀟灑秋堂更  
雨聲

和詵上人雪詩

貧巷仍飛雪空庭迴絕塵照窓疑不夜着樹忽驚

春枕冷夢魂短山明天宇新賦詩分氣象定有灞  
陵人

澗上

遠徑留殘照疎林出小園山川半豺虎歲月且琴  
樽杜老新雞柵龐公舊鹿門不才真忝竊人道典  
刑存

新涼

頗覺小眠快便知秋意真清風論世舊老圃得時



新移竹觀君子翻書訪古人可人陶靖節隨意葛  
天民

過蓀縣董大夫廟

漢朝元不用真儒豈信忠嘉益帝圖賈誼長沙晁  
錯死不須獨恨老江都

寓居寫懷

平陸溫風雪半消孤烟籬落隔溪橋趁虛人去林  
臯靜時有晚鴉銜墮樵

得鶯應制

駕鶯得暖下陂塘綵騎星馳入建章黃傘輕陰隨  
鳳輦綠衣小隊出鷹坊搏風玉爪凌霄漢瞥目風  
毛墮雪霜共喜園陵得新薦侍臣齊捧萬年觴

**補**歸潛志閒閒又稱趙黃山詩云燈暗風

翻幔蛩吟葉擁墻人如秋已老愁與夜俱  
長滴盡階前雨催成鏡裏霜黃花依舊好  
多病不能觴此詩信佳詩也又黃山嘗於



黃山道中作詩有云好景落誰詩句裏蹇  
驢馱我畫圖中世號趙蹇驢余先子翰林  
嘗談章宗春水放海青時黃山在翰林扈  
從旣得鶩索詩黃山立進之章宗稱其工  
且曰此詩非宿構不能至此



全金詩卷二十一

三七

黃山道中作詩有云好景客淮寺句良甚



